

Johanna Brugger-Cavegn

23-11-9?

L'annunzia dalla mort da Johanna Brugger-Cavegn entras nies plevon sur Alexi, ils 10 d'october suenter messa, ha effectuau ina generala consternaziun. Bein fuvan ins pertscharts che la vegliadetgna e la malsogna mudergiavan ella dapi jamnas e meins. Sia mort ei denton stada per nus in avis, per ella in sedumentar enten il Segner.

La defuncta deriva dalla famiglia dil Florentin e da Carlina Cavegn-Schmed da Sedrun. Johanna ei naschida ils 2 da fevrier 1910. Els ein stai 12 affons, quater fegls ed 8 feglias. Ils geniturs ein stai ils emprems ustiers dil vegl restaurant «Krüzlipass» ch'il bab ha sez giu schau construir. Quella famiglia ei era stada decennis ora possessura da l'ustria Oberalppass sil cuolm d'Ursera.

Bagheggiar cuosta e trer si ina famiglia cun tons affons vegn era buca cun nuot. Aschia han tutt stuiu tener leu da segidar en famiglia e casa. Era la defuncta Johanna ha stuiu suttacumber a quella lescha da famiglia e schegie ina dellas giuvnas, vegnida tratga en quella via. Quei ei stau quei che ha bein era gidau ella en sia veta futura; pigliar en e gidar nua ch'ei fa basegns. Sias scolas primaras e dus onns reala ha ella adempliu en Tujetsch.

Igl onn 1935 eis ella sespusada cun il giuven Leci Brugger dell'ustria dalla Posta a Rueras. Lur nozzas han giu liug ils 21 da november 1935. Gia quei unviern han quels dus carstgauns giuvens surpriu ed aviert l'ustria sil cuolm d'Ur-



sera per quei unviern. Quei vegn ad esser stau igl emprem unviern nua ch'igl ei stau aviert ustria si leu. Mirond anavos tgei il turissem empermetteva da lezs onns par'ei segir d'esser stau in ughetg.

Ils onns suandonts ein il Leci e sia Johanna segidai cun la famiglia dil bab Leci Antoni Brugger-Monn en menaschi d'ustria e puresser. Denton ei la famiglia carschida onn per onn sin siat affons; sis feglias ed in fegl. Igl onn 1942 ha il bab Leci Antoni surdau la fätschenta d'ustria alla famiglia giuvna. Cheu ei veramein sefatg valer il beinvulent caracter dalla Johanna. Viver ensemble cun quinadas e quinai e luvrar e barhar onns ora senza scarpetschs vul dir zatgei e dat perdetga d'in niebel caracter. En quels fatgs ei la defuncta ve-

ramein stada in exempl. Ella fuva mumma, patruna, cuschiniera renconuschida, fageva la pura e la survienta, tut sco ei sedumandava. Quei ei fetg probabel stau il fretg dall'educaziun ar-tada en l'affonza. En quels onns ha ei tuccau ad els dus da clauder ils egls alla tatta Culastia (†1941), al tat Leci Antoni (†1948), alla quinada Annastasia (†1970) ed al quinada Placi (†1972). Tgi che ha enconuschiu la defuncta sa ch'ella ha fatg bien cun tuts.

Era ils onns d'uiara han dumandau bia lavur e truscha per ella nua che siu mariu fuva meinsvart en survetsch ed il Tujetsch fuva bunamein inundaus dil militer. Aschia ei la veta sefatga ed era ils affons ein in suenter l'auter sgulai ora. Restada anavos cun ils geniturs ei la feglia Carlina.

Igl onn 1974 ein il Leci e la Johanna setratgs en lur liug da refugi da vegliadetgna; la casa ch'ils geniturs dil Leci havevan gia habitau en lur vegls dis. Prest vegn onns vegn quei, onns che vegnan segir era ad haver purtau bia glisch tras lur affons e biadis e biadias. Denton, la vegliadetgna e la sanadad han la Johanna aschi ch'ella ha rendiu si'olma ils 10 d'october al suprem Sigrur. Nus havein piars ina buna vischina, ina ch'ei stada sia vet'ora ina persuna modesta; ella vegn a muncar a nus. Vegli il Segner prender si ella en sia patria eterna e consolar siu mariu ed ils ses. – Ruaussa en pasch e sin seveser.

JOHANNA BRUGGER-CAVEGN, RUERAS



Quasi consternaziun ha surpriu ils vischins da Rueras cura che sur Alexi ha annunziau la mort da Johanna Brugger la dumengia da messa, ils 10 d'october. Bein fuvan ins pertscharts dalla fleivlezia e vegliadetgna dalla Johanna, mo sia mort ei quasi stau per nus in avis.

La defuncta deriva dalla famiglia da Florentin e Carlina Cavegn-Schmed da Sedrun, ina famiglia cun 11 affons. Sia naschientscha ei sefatga la fiasta da Nossaduna da candeilas ils 2 da fevrer 1910. Sia affonza, scolazion e giuentetgna passenta ella a Sedrun. Igl onn 1935 sespusa ella a Rueras cun Leci Brugger. Ei ha tuccau ad ella, sco a schi biaras, da

seschar en en sia veta cun empau dil tut. Ella ha fatg la pura, l'ustiera, la cuschiniera e survienta. Bia midadas da famiglia ha ella fatg atras. Ella ha serraui ils egls a sia sira Culastia, al vegl bab Leci Antoni, a siu quinau Placi ed alla quinada Annastasia, cun ils quals ella ha giu biars onns da far viadi sin quest mund. Segir ha ella fatg bia bien cun quels e sa ussa retscheiver la pagaglia perpetna. Dasperas tila ella si in famiglia cun siat affons. La Johanna ei buca stada ina femna da grondas caneras. Sia ruasseivladad e siu esser beinvulcent han gidau ella a mantener il car della veta sin las dretgas rodaias. Ils davos onns ha ella denton sentiu la direzia dalla vegliadetgna, mo purtau quella cun resignaziun e pazienza.

Vegli il Segner ver priu ella en Siu reginavel e dar legria perpetna e vegli el era dar a siu mariu la grazia da purtar la crusch dalla solitariadad e consolar tut ils ses. - La gisch perpetna sclareschi ad ella.